

cis. Abundat salis fontibus, unde magnum colligitur ab incolis emolumentū. In Norico iuxta syluā Bohemicā frequentes sunt ferri mineræ, & iuxta Athe-
sim in loco qui uocat Schuatz uberrimæ sunt argentifodinæ, ex quibus annu-
atim ingens uis eruitur argenti. Irrigatur terra ipsa plurimis piscolis amnis,
qui omnes in Danubium exonerantur, augentq; illum mirum in modum. Ha-
buit præterea Bauaria à multo tempore proprium ducem, qui & tempore Ot-
tonis imperatoris tertij numeratus est inter quatuor duces imperij. Colligitur
etiā ex historijs Bauariam ante Christum natum & aliquandiu post eius nati-
uitatem habuisse regem, sicut Iulius Cæsar scribit, Ariouistū Alemannorū re-
gem uxorem duxisse, sororem regis Norici. Inuenitur quoq; Garibaldum re-
gem Bauariæ tradidisse filiam suam Theodelindam in coniugē regi Lombar-
diæ. Postea anno Christi 612. fuit Teudo dux in Bauaria, & hic baptisatus est
à sancto Ruperto episcopo Vuormaciensi, qui & postea episcop. fuit Saltz-
burgensis. Transactis deinde aliquot annis, ducatus Bauariæ peruenit ad Ca-
roli magni posteros, qui præfuerūt Bauariæ usq; ad imperatorem Arnolphum,
qui anno Christi 889. extruxit in Bauaria inter Monacū & Ingolstadtium bur-
gum nomine Schyern, cui præfecit Comitem palatinum. Ab isto Arnolfo &
posteris eius peruenit ducatus Bauariæ mediantem muliebri prole ad duces Sa-
xonie. Alij asserunt Ottonem imperatorem anno Christi 947. ducatum Baua-
riæ tradidisse fratri suo Henrico Saxoni, qui auus fuit sancti Henrici imperato-
ris. Cumq; sanctus iste Henricus sine herede decederet, contendebant comites
à Schyern pro ducatu Bauariæ, uerum nihil efficere potuerūt, cum ducatus flu-
ctuaret iam sub Saxonibus, iam sub Marchionibus Austriæ, & iam sub Vuel-
pis Sueuiæ usq; ad annum Christi 1156. Quo tempore imperator Fridericus de-
dit hunc ducatum Henrico duci Saxonum, sublimauitq; Marchionē Austriæ
in ducem, adiiciens prouinciæ eius aliquot comitatus ex ducatu Bauariæ. Po-
stea anno Christi 1180. rursus exclusit imperator hūc Henricum ob superbiam
eius ab utroq; ducatu, factusq; est Otto comes à Schyern & comes Palatinus
à Vuitelspach, dux Bauariæ, & ab illo descenderunt omnes duces Bauariæ &
Palatini Rheni, qui ab eo tempore usq; nunc nati sunt. Iste Otto genuit Ludo-
uicum, Ludouicus alium genuit Ludouicum, & is duos habuit filios, nempe Ru-
dolfum & Ludouicum: Rudolfo pater dedit Palatinatum Rheni & Ludouicū
fecit successorem in ducatu Bauariæ. A Rudolfo descenderunt moderni prin-
cipes Palatini, ut in tabula Rheni III. ostendi. Porro Ludouicus factus est im-
perator, & inter multos filios duo illi successerūt in ducatu, Stephanus & Al-
bertus. Albertus fixit sedem in Straubingen, defecitq; linea eius in filijs eius.
Stephanus diuisit in senectute sua ducatū trib. filijs suis, nempe Stephano, Fri-
derico & Ioanni. Stephani linea defecit in filijs eius. Fridericus uero, cui forte
obuenerat Landshuta, genuit Henricum, Henricus genuit Ludouicū, Ludo-
uicus habuit unum filium, nempe Georgium, qui cognominatur dux diues
à Landshut, & filiam Margaretam, quam duxit Philippus Palatinus. Et cum
hic Georgius moreretur sine liberis, exortum est temporibus nostris hor-
rendum bellum Bauaricum. Porro dux Iohannes à Monaco genuit Ernestū,
Ernestus genuit Albertum, Albertus genuit alium Albertum aliosq;
filios, Albertus genuit Vuilhelmum & Ludouicum qui
isto tempore Bauariæ præsunt.